

Unammilleqatigiinneq pillugu inatsisartut inatsisaanni kaaviiartitat ilaallu ilanngullugit naatsorsorneqartarnerat pillugu Namminersorlutik Oqartussat nalunaarutaat nr. 13, 23. juuli 2015-imeersoq

Unamminneqatigiinneq pillugu inatsisartut inatsisaanni (unammilleqatigiinnermut inatsit) nr. 1, 15. maj 2014-imeersumi § 7, imm. 6 aamma § 15, imm. 4 malillugu aamma Unammilleqatigiinnermut Ataatsimiititaliamit oqaaseqaaat malillugu ima aalajangiineqarpoq:

Kaaviiartitat

§ 1. Nalunaarummi matumani ”kaaviiartitat” ima paasineqassapput, nalinginnaasumik ingerlatsinnermut atatillugu akitsuutini imaluunniit akileraarutini, tuniniaanermi toqqaannartumik attuumassuteqartunik ilanngaareerluni kaaviiartitat, takuulli §§ 7-9.

Imm. 2. Suliffeqarfiup peqataasup kaaviiartitai, tak. unammilleqatigiinnermut inatsimmi § 7, imm. 1, nr. 3-mi, ukiumi kingullermi naatsorsuusiorfiusumi kaaviiartitatut naatsorsorneqassapput, takuulli §§ 7-9.

Imm. 3. Unammilleqatigiinnermut inatsimmi § 7, imm. 1, nr. 3 malillugu kaaviiartitat, suliffeqarfiit peqataasut kaaviiartitaasa katinnerisut naatsorsorneqassapput.

Imm. 4. Ukiup naatsorsuusiorfiusup kingulliup naammassereernerata kingorna suliffeqarfiup peqataasup ataatsip arlallilluunniit suliffeqarfimmi ilaa tunisimappagu, kaaviiartitat tamatumunnga aallaavissineqarsinnaasut, suliffeqarfiup peqataasup kaaviiartitaanit ilanngaatineqassapput. Kaaviiartitat pigisanut aallaavissineqarsinnaasut, taamaalilluni ukiumi naatsorsuusiorfiusumi misissuineq malillugu pissarsiarineqarsimasut, suliffeqarfiup peqataasup kaaviiartitaanut ilanngunneqassapput.

Suliffeqarfissuit kaaviiartitaat

§ 2. Suliffeqarfiup peqataasup kaaviiartitaanut aamma suliffeqarfinni attuumassuteqartuni kaaviiartitat ilaapput, tak. § 3. Suliffeqarfik peqataasoq imaluunniit attuumassuteqartoq aamma tassaasinnaavoq naalagaaffik, Namminersorlutik Oqartussat, kommuneqarfik imaluunniit kommuneqarfiit ataatsimoorussaasut, tak. § 9.

Imm. 2. Suliffeqarfiup peqataasup kaaviiartitaanut ilaatinneqanngillat suliffeqarfiup peqataasup suliffeqarfiillu attuumassuteqartut akornanni kaaviiartitat imaluunniit suliffeqarfiit attuumassuteqartut akornanni kaaviiartitat.

§ 3. Nalunaarummi matumani ”suliffeqarfiit attuumassuteqartut” ima paasineqassapput:

- 1) Suliffeqarfiit piginneqataaffigineqartut. Suliffeqarfiit, piginneqatigiiffiit aktieselskabit pillugit inatsisip Kalaallit Nunaannut atuutilernerani aaqqiissummi § 2-mi taaneqartutut, suliffeqarfik peqataasoq toqqaannartumik imaluunniit toqqaannangitsumik aalajangiisumik sunniuteqarsinnaasoq.
- 2) Suliffeqarfiit piginnittuusut. Suliffeqarfiit suliffeqarfimmi peqataasumi aalajangiisumik sunniuteqarsinnaasut.
- 3) Suliffeqarfiit allat, tassani suliffeqarfik piginnittuusooq aalajangiisumik sunniuteqarsinnaasoq.
- 4) Suliffeqarfiit, tassani suliffeqarfiit arlallit, nr. 1-imit 3-mut taaneqartutut, ataatsimoorlutik aalajangiisumik sunniuteqarsinnaasut.
- 5) Suliffeqarfiit, nr. 1-imit 4-mut ilanngunneqanngikkaluarlutik, allaganngorlugu isumaqatigiinnikkut imaluunniit suliffeqarfiit maleruaqqusaani aalajangersakkat malillugit ataatsimoortunik aqutsisoqarlutik inissisimalersut imaluunniit taakkunangaanniit aalajangiisumik sunniuteqartumik inissisimalersut, makkua tunngavigineqarpata;
 - a) suliffeqarfiit peqataasut niuerfinni qanoq iliortarnissaat pillugu ataatsimoortumik aqutsisut ataqatigiissaarpatigik, aamma
 - b) suliffeqarfiit peqataasut ataannartut ataatsimoortumik aqutsisunit aqunneqarunik, aamma
 - c) niuernermi aarlerinaatit aamma aningaasarsiornermi inernerit qanoq agguarneqartarnissaat pillugu aaqqiissuteqarunik.

§ 4. Suliffeqarfiit peqataasut marluk arlallilluunniit ataatsimoorlutik suliffeqarfimmi ataatsimi aalajangiisumik sunniuteqarpata, suliffeqarfiup pineqartup kaaviiartitai kaaviiartitat katinnerini ilanngunneqassapput.

Imm. 2. Imm. 1 malillugu kaaviiartitat katinneri, suliffeqarfiit peqataasut aamma suliffeqarfiup ataatsimoortumik aqunneqartup akornanni kaaviiartitat ilaatinneqanngillat.

Kaaviiartitat allat

§ 5. Suliffeqarfik peqataasoq suliffeqarfinnik allanik taama assingusunik isumaqatigiissusiorsimappat, unammilleqatigiinnermut inatsimmi § 7, imm. 1 malillugu suliffeqarfiit taakku kaaviiartitaat kaaviiartitat katinnerini ilanngunneqassapput.

Imm. 2. Kaaviiartitat katinneri suliffeqarfiit imm. 1-imi taaneqartut akornanni kaaviiartitat ilaatinneqanngillat.

Branchini peqatigiiffiit aamma kattuffiit

§ 6. Branchimi peqatigiiffimmi imaluunniit kattuffimmi allami tamatumunnga nallersuussinnaasumi, tak. unamminneqatigiinneq pillugu inatsisartut inatsisaat § 7, imm. 1, nr. 3, kaaviiartitat peqatigiiffimmut ilaasortanut ataatsimut kaaviiartitatut naatsorsorneqassapput peqatigiiffiup nammineq kaaviiartitaanut ilanngullugit.

Imm. 2. Imm. 1 malillugu peqatigiiffiup kaaviiartitai peqatigiiffiup taassumalu ilaasortaasa akornanni kaaviiartitat ilanngaatalugit naatsorsorneqassapput.

Suliffeqarfiit aningaasarsiornermik ingerlataqartut

§ 7. Selskabit sillimmasiisarfiit eqqarsaatigalugit, kaaviiartitanut taarsiullugu ilanngaateqarnani sillimmasiinernut akiliutit nalingi ilanngunneqassapput, tassa sillimmasernissamut isumaqatigiissutit selskabinit taakkunanga pissarsiarineqarsimasut imaluunniit taakku akiligaannik imaluunniit siunissami pissarsiarineqartussaasut tamaasa ilanngullugit, tamakkununga ilanngullugit sillimmaseqqinnissamut isumaqatigiissutit avataaniilersimasut ilanngullugit, akileraarutit imaluunniit akitsuutit akileraarutinut assingusut, sillimmasernermi akiliutissatut aningaasat tunngavigalugit akileqquneqarsimasut imaluunniit sillimmasernermi katinnerit tunngavigalugit akileqquneqarsimasutut tunngaveqartut ilanngaaticereerlugit.

§ 8. Taarsigassarsisitsisarfiit imaluunniit suliffeqarfiit aningaasarsiornermik ingerlataqartut eqqarsaatigalugit kaaviiartitanut taarsiullugu isertitat makku katinneri atorneqassapput, taamaassappallu akileraarutit imaluunniit akitsuutit akileraarutinut assingusut, isertitanut tamakkununga toqqaannartumik attuumassuteqartut ilanngaaticgalugit:

- 1) Erniaatigut isertitat assigisaallu.
- 2) Aktiaatitigut iluanaarutit assigisaallu aamma aningaasaqarnermi pissarsiat allat.
- 3) Sullissinermi akiliutinit isertitat tunisinermilu iluanaarutinit isertitat assigisaallu.
- 4) Pappilissat nalinginik aamma nunat allat aningaasaasa nalinginik naleqqussaarinert assigisaallu, tamakku katillugit sinneqartoornerruppata.
- 5) Isertitat nalinginnaasut allat.

Naalagaaffik, Namminersorlutik Oqartussat, kommuneqarfiit imaluunniit kommuneqarfiit
ataatsimoorussa

§ 9. Naalagaaffik eqqarsaatigalugu kaaviiartitanut taarsiullugu, ministereqarfimmut pineqartumut ukiumut kingullernut naatsorsuusiorfiusumut ingerlatsinermit illuutinullu ilanngaateqarnani aningaasartuutit katinneri atorneqassapput, tak. naalagaaffiup kontoplan-iani suussusersiinerit pingaarnert 1 aamma 3.

Imm. 2. Namminersorlutik Oqartussat eqqarsaatigalugit kaaviiartitanut taarsiullugu, naalakkersuisoqarfimmut pineqartumut ukiumut kingullernut naatsorsuusiorfiusumut ingerlatsinermit illuutinullu ilanngaateqarnani aningaasartuutit katinneri atorneqassapput, tak. suussutsinut kontut 1 aamma 7, Namminersorlutik Oqartussat naatsorsuuserinermi ilitsersuutaata kontulersuinernut ilitsersuummi kisitsimmi 7-mi takuneqarsinnaasutut.

Imm. 3. Kommuneqarfiit imaluunniit kommuneqarfiit ataatsimoorussa eqqarsaatigalugit kaaviiartitanut taarsiullugu ukiumut kingullernut naatsorsuusiorfiusumut ingerlatsinermit illuutinullu ilanngaateqarnani aningaasartuutit katinneri atorneqassapput, tak. suussutsinut kontut 0-imit 5-imut, tak. kommuneqarfiit kontoplaniani kisitsit 7.

Kaaviiartitat danskit koruuniinut naatsorsorneri

§ 10. Nunat allat aningaasaanni kaaviiartitat suliffeqarfiup ukiumi kingullermi naatsorsuusiorfiani nunat allat aningaasaasa nalingisa naatsorsornerini agguaqatigiissinneqarnerat malillugu danskit koruuniinut naatsorsorneqartassapput.

Kalaallit Nunaanni kaaviiartitat

§ 11. Kalaallit Nunaanni kaaviiartitanut ilaapput, tak. unammilleqatigiinnermut inatsimmi § 15, imm. 1, nioqputissanik tunisinerit imaluunniit sullitanut kiffartuussutinik tunisinerit, piffissap isumaqatigiissuteqarfiusup nalaani Kalaallit Nunaanni nalunaarsorsimasut.

Imm. 2. Taarsigassarsisitsisarfiit suiffeqarfiillu aningaasarsiornermik ingerlataqartut allat eqqarsaatigalugit Kalaallit Nunaanni kaaviiartitanut ilaapput, tak. § 15, imm. 1, isertitat, tak. § 8, suliffeqarfiup immikkoortortaanni imaluunniit Kalaallit Nunaanni immikkoortuini pissarsiarisaat.

Kaaviiartitat killinginik qaangiineq

§ 12. Unammilleqatigiinnermut inatsisip § 7, imm. 1, nr. 3-ani § 6, imm. 1-ani inatsisip inerteqqusiinerani ilaatitsinnginneq atuuppoq, suliffeqarfiit peqataasut ukiuni naatsorsuusiorfiusuni tulleriit marluk angullugit kaaviiartitsineq taaneqartoq annerpaamik procentinik qulinik qaangeraluarpatigilluunniit.

Imm. 2. Imm. 1-imi aalajangersagaq atorneqassanngilaq, kaaviiartitsinnermut killigitaq taaneqartoq suliffeqarfimmut allamut kattussimanerata kinguneranik qaangiisimaneq pisimappat, suliffeqarfiit kattunnerat pillugu Namminersorlutik Oqartussat nalunaarutaani nassuiarneqarsimasutut.

Atuutsinneqalerfissaa

§ 13. Nalunaarut manna atuutilissaaq ulloq 15. agusti 2015.

Namminersorlutik Oqartussat, ulloq 23. juuli 2015.

Vittus Qujaukitsoq

